



*Komunikadu Imprensa*  
*Tribunál Distritál Baucau*  
*30 Outubro 2015*

### **Tribunál Distritál Baucau julga maioria kazu violénsia doméstika liu hosi julgamentu movél iha Distritu Viqueque**

Iha 19 to'o 23 Outubro 2015, Tribunál Distritál Baucau realiza julgamentu movél iha Distritu Viqueque. Iha julgamentu ne'e, tribunál julga total kazu 10 ne'ebé involve krime ofensa ba integridade fízika simples ho natureza violénsia doméstika 7 no krime ofensa ba integridade fízika simples 3.

Entre kazu violénsia doméstika 7 ne'e, tribunál konklui ona nia prosesu no kondena ho pena prizaun maibé ninia ezekusaun suspendidu no kazu 3 ofensa sira seluk tribunál omologa.

“Hein katak ho aprosimasaun tribunál movel iha área rural sira bele sai nu'udar meius ida ba kampaña no divulgasaun kona-ba violénsia doméstika hanesan krime publiku tuir ita nia enkuadramentu legál Timor-Leste nian no JSMP enkoraza tribunál sira atu asegura pena adekuada ba krime sira violénsia doméstika iha Timor-Leste”, dehan Diretór Ezekutivu JSMP, Luis de Oliveira Sampaio.

JSMP hanoin katak ho realidade atuál Timor-Leste ohin loron nian, tribunál movel nu'udar opsaun alternativu ida ne'ebé apropriadu liu atu hatan ba dezafiu sira ne'ebé comunidade sira iha área rural enfrenta. Liu-liu atu hatan ba kestaun limitasaun finanseiru no kestaun distánsia ne'ebé durante ne'e sai nu'udar dezafiu klasiku ne'ebé impede comunidade atu asesu ba justisa.

Mesmu nune'e, JSMP nafatin observa katak kestaun distansia kontinua sai problema wainhira hala'o prosesu julgamentu. JSMP observa katak fatin Esquadra Polísia Sub-distritu Viqueque Vila no hela fatin hosi parte sira ne'ebé involve iha prosesu ne'e nia diresaun sei dok, nune'e tribunál tenke kontinua ajuda tula parte sira ho transporte operacional tribunál nian hosi Ossu atu ba tuir julgamentu iha Viqueque vila.

Rua setubal, Colmera, Dili Timor Leste  
PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

JSMP mós observa katak julgamentu movel ne'e hala'o ho kordenasaun no planeadu diak tebes hosi Komando Polísia Nasional Munisipal Baucau hosi inisia julgamentu to'o julgamentu movel remata. Polísia sira akompaña autór judisiáriu hosi inisia hosi Baucau too julgamentu remata no akompaña fali mai Munisipiu Baucau.

Julgamentu movel ne'ebé realiza durante loron 5 ne'e, aleinde julga kazu sira ne'ebé tama ona iha agenda, mekanismu ne'e mós inderitamente intruduz ba comunidade sira oinsa sistema justisa formal nia funksionamentu. Ida-ne'e bele sai nu'udar mekanismu prevensaun indireta iha comunidade nia leet tanba sira hare ho matan, sente rasik sistema justisa formal iha sira nia leet.

Julgamentu movel ne'e prezide husi juis Administradór Tribunál Distritál Baucau, Dr. Afonso Carmona, Ministériu Públiku representa hosi Dr. Pascasio de Rosa Alves, Defensória Públiku representa hosi Dr. Jose Maria Guterres (estajiáriu).

Atu hetan informasaun liutan bele kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)